



**Ineriartorneq ataatsimoorfiusoq**

**2013-2017**

**Qeqqata kommuniani  
Siumut / Atassut  
suleqatigiinnissamik isumaqatigiissutaat.**

**Siulequt:**

Siumut aamma Atassut Qeqqata kommuniani suleqatigiinnissamik isumaqatigiipput.

Suleqatigiit isumaqatigiipput ammasumik aqutsineq toqqammavigalugu Qeqqata kommuniata aqunneqarnera ingerlaqqissasoq, innuttaasut oqartussaaqataanerat akisussaaqataanerallu qulakkersimaniarneqassaaq.

Suleqatigiit innuttasut assigiimmik naligiimmillu periarfissaqartinnissaat atugassaqartinneqarnissaallu qulakkeerniarpaat.

Suleqatigiit upperaataq nutaaliorusussuseqarneq anersaaralugu Qeqqata kommunia ineriartortinneqassasoq nammineersinnaanerput annertusarumallugu.

Qeqqata kommuniani innuttaasut tamarmik neriuteqartut siunissamullu isumalluartut peqatigalugit suleqatigiit sulissapput.

**Suleqatigiinneq:**

Tatigeqatigiinneq aallaavigalugu unneqqarissamik pissuseqarluni kiisalu tutsuiginassusilimmik suleqatigiinneq ingerlanneqassaaq.

Ilisimasat misilittakkallu tunaartaralugit Qeqqata kommuniani sulineq ingerlanneqassaaq.

Innuttaasut toqqissisimanissaat qitiussaaq, ammasumik ingerlatseriaaseqarneq, akuutitsineq sunniuteqaqataanerlu aallaviussapput.

Aammattaaq suleqatigiit isumaqatigiissutigaaq ukiut tamaasa Qeqqata kommuniani missigersuutitigut suliaqarnermi ataatsimoorluni anguniagassat piareersarneqartassasut. Innuttaasut akileraarutitigut akitigullu artukkinnginnissaat aalajangiinerni toqqammavittut atorneqassaaq.

**Innuttaasunik sullissineq.**

Innuttaasunik paasissutissiisarnerup pitsaasumik ingerlaavarnissaa suleqatigiit sulissutigissavaat. Tamannalu ilaatigut ingerlanneqassaaq Qeqqata kommuniani tusagassiuutit atorluarneqarnerisigut aammalu innuttaasunik ataatsimiisitsisarnerit piffissani aalajangersimasuni ataavartumik ingerlanneqarnerisigut.

**Meeqqeriveqarneq:**

Meeqqerivinniittuutitaqarnermi akigitat sapinngisamik qummut killilernerqarsimanagerat, tassalu annerpaamik kr. 1.000,- periarfissaatillugu sapinngisamik inissisimatineqassaaq, kiisalu aningaasarsiakinnerpaanut minnerpaaffianiitineqassaaq.

Nunaqarfinni meeqqeriviit eqqarsaatigalugit, meeqqerivittut illuutigineqartut naleqqusarneqarnissaat suleqatigiit isumaqatigiissutigaat kiisalu meeqqerivinni tamani meeraateqassuseq aallaavigalugu naleqqussaajuarnissaq ingerlanneqassasoq isumatigiissutigineqarpoq.

**Kulturi, atuarfeqarneq sunngiffillu:**

Inuusuttuaqqat nunanut allanut annertusisamik ilinniariartorniartut, oqaatsinilluunniit ilinniariartorniartut aningaasaateqarfiliunneqassapput. Tassani piumasaqaatit assigiinngitsut naammassineqarsimassapput.

Atuarfiit nutartertuarnissaat Naalakkersuisut peqatigalugit ingerlanneqassaaq. Angajoqqaat ilinniartitsisullu suleqatigalugit atuarfinni atuartuuneq sulisuunerlu toqqissisimasumik ingerlanissaat anguniarlugu suleqatigiittoqassaaq.

Kulturikkut Timersornikkullu kajumissutsiminnik suliniuteqartut tassaapput kommunitisinni annertoorujussuarmik suleqataasut, taamaattumik taakkununga atugassarititaasut pitsaasuunissaat suleqatigiinnit pingaartinneqarpoq.

**Kulturikkut aningaasaateqarfik:**

Qeqqata kommuniani kulturimut aningaasaateqarfik kulturikkut suliniuteqartunit kikkunnilluunniit qinnuteqarfigineqarsinnaasoq pilersinneqassaaq, aningaasaateqarfillu kommunalbestyrelsip atuuffiani 2013 – 2017 pilersinneqassasoq suleqatigiinnit anguniarneqarpoq.

**Ineqarneq:**

Aningaasaleeriaatsit atuuttut atorlugit illoqarfinni nunaqarfinnilu tamani inissiat ullutsinnut naleqquttut sanaartorneqarnerat ingerlateqqinneqassaaq, kiisalu imeqarnikkut uffarfeqarnikkut kuuffissuaqarnikkullu pitsanngorsaanerit ingerlanneqassapput. Naalakkersuisut annertunerpaamik aningaasaliissuteqarnissat ugartortuarneqassaaq.

**Kalaallisut oqaatsivut:**

Kalaallisut oqaatsitta Nunatsinni pingaarnertut oqaasiuneri Qeqqata kommuniani tamatigut aallaaviupput. Innuttaasoq kinaluunniit oqaatsit nammineq atorsinnaasani aallaavigalugit sullinneqartassaaq.

### **Qeqqata Kommuniani atukkatigut assigiissaarineq:**

Suleqatigiinniit ukiuni tullerni pingaartilluinnarlugu anguniarneqassaaq Qeqqata Kommuniani tamarmi atukkatigut naligiissaarinerup ingerlaqqinnissaa, kommunilu ataasiugaluarluta ilisimavarput atugassarisagut Nunap nammineq pissusiata ilaatigut assigiilivississinnaanngikkai. Taamaattoq Qeqqata kommuniani nammineq aalajangiiviginnaasaani innuttaasut tamarmik atugassarisasa assigiisinnegarnissaat suleqatigiinnit pingaartinneqartuassaaq.

### **Maniitsumi nipilersornermik ilinniarfik:**

Maniitsumi nipilersornermik ilinniarfiup pilersinneqarnissaa anguniarneqassaaq. Ilinniartitsisunik nipilersornermik ilinniartitsisinnaasunik ilinniartitsisoqarluni aaqqissuussaasumik Maniitsumi nipilersornermik ilinniarfik Sisimiunisuulli ingerlanneqassaaq. Maniitsumi nipilersornermik ilinniarfiup pilersinneqarnissaanut Qeqqata kommunia aningaasaateqarfinnik aningaasaliisinnaasunik aningaasaliissarsiusaaq.

### **Kommunip illoqarfittaani naluttarfittaarniarnerit:**

Suleqatigiinnit tapersorneqarpoq kommunip illoqarfiini marluusuni naluttarfittaarniarluni suliniuteqarnek, naluttarfittaarniarluni suliniuteqarnerit tamarmik suleqatigiinnit tapersorneqarlutik pilersinneqarnissaanut Qeqqata kommunia tapersersuissaaq.

### **Timersortarfiit silamilu timersuutit:**

Qeqqata Kommuniata timersoqatigiiffinnut annertuumik tapersersuinini ingerlateqqissavaa, periarfissallu pitsanngorsarneqartuarnierinut tapersersuineq ingerlanneqartuassalluni. Taamaattumillu aamma timersortarfinnik suleqatiginnineq tapersersuinerlu pitsaasoq ingerlateqqinneqassaaq. Nunaqarfinnilu timersortarfeeraqanngitsuni pilersitsinissaaq anguniarneqassaaq, taakkulu tamatigoortuussaapput.

### **Qeqqata kommuniani timersortartut kulturilerisullu ulluat:**

Qeqqata kommuniani ulloq aalajangersimasooq tassaalissaaq Qeqqata kommuniani timersortartut kulturilerisullu ulluat. Ulloq inissisimassaaq ukiup naalernerani imaluunniit ukiup nutaap aallartilaarnerani. Ullormi tassani timersortartut ukiup ingerlanerani angusarissaarsimasut nersorniarneqartassapput sumiiffinnilu tamani timersullammannik toqqaasoqartassalluni. Ullormi tassani aamma Qeqqata kommuniani peqatigiiffitsialammik toqqaasoqartassaaq kiisalu malunnaatilimmik kulturikkut ingerlatsisimasunik/mik nersuiniartoqartassalluni. Ulloq aaqqissuunneqartassaaq timersoqatigiiffiit, peqatigiiffiit kulturimullu tunngasumik suliniuteqartut suleqatiginerisigut.

**Ilaqutariit inunnillu isumaginnineq:**

Suleqatigiit isumaqatigiissuteqarnerminni ilisimavaat ilaqtariinnut tunngasunik tamatumalu malitsigisaanik inunnik isumaginninnermut tunngasunik suliniutit annertuut ukioni tullerni ataavartumik ingerlanneqartariaqartut.

**Ajornartorsiutit annertusinnginnerini iliuseqarsinnaaneq:**

Suleqatigiinnit pingaartinneqarluni inuiaqatigiinni ajornartorsiutit inuusaatsimik aallaaveqartut suliniarfigineqarnerat annertunerulersinneqassasoq suliniutigineqassaaq, taamaattumik pilersaaruserlugu aqqissuunneqassaaq Qeqqata kommuniani innuttaasut inuusaatsimik aallaaveqartumik ajornartorsiuteqartut ajornartorsiutit annertusinnginnerini suliniarfigineqarpata. Inuusuttuaqqanut suliffeqanngitsunut ilinniagaqanngitsunullu annertuunik suliniuteqartoqassaaq aammalu inuusuttuaqqat naartuliaartartut pillugit immikkut suliniuteqartoqassalluni tamannalu peqqinnissaqarfimmi suliniutinut pitsaasunut tapertaasumik ingerlanneqassalluni. Suleqatigiit anguniarpaat ilaqtariit eqqugaanissaat utaqqeqaarnagu suliniarfigineqartarnissaat.

**Inuit atorerluisuunerminnit katsorsarneqartariaqartut:**

Suleqatigiit ilisimaarilluarpaat inuiaqatigiinni imigassamik, ikiaroorartumik aningaa-sanoorajunnermillu ajornartorsiut milliartunnginnerat. Tamanna ataavartumik pingaartillugu suliniarfigineqassaaq, Qeqqata kommuniata pingaartippaa tamatuma suliniarfigineqarnerani sapinngisamik angerlarsimaffik qimannagu ingerlanneqarsinnaanissaa. Taamaattumik katsorsaanerit ataavartumik aqqissuulluakkamillu namminermit ingerlanneqarnissaat Qeqqata kommuniata anguniassavaa.

**Siusinaartumik sulisinnaajunnaarnersiuteqalertussat piareersartinneqartarneri:**

Siusinaartumik sulisinnaajunnaarnersiuteqalertarneq inummut namminermit ilaqtariinnullu annertuumik sakkortuumillu eqquisinnaasarpoq. Taamaattumik piviusunngortinneqassaaq siusinaartumik sulisinnaajunnaarnersiuteqalertussaqaalersillugu inuup innersuunneqartup ilaqutaasalu ikiorserneqartarnissaat, inuttut ikorfartortariaqarfimmi ikorfartuineq, periarfissanik assigiinngitsunik paasisutissiineq ataavartumillu inummut iluaqutaasinnaasunik aqutissiuussineq pingaartillugit suliniuteqartoqassaaq.

**Utoqqaat siusinaartumillu sulisinnaajunnaarnersiutillit assassorfigisinnaasaat:**

Utoqqaat siusinaartumillu sulisinnaajunnaarnersiutillit assassorlutik suliaqarfigisinnaasaannik værkstedinik (soorlu mersoriarfigisinnaasaannik, naneruusiorfigisinnaasaannik allanilluunniit assassorfigisinnaasaannik) utoqqaat illuisa avataanniittunik pilersitsisinaanermut periarfissat misissorneqassapput. Taamaaliornikkut utoqqaat siusinaartumillu sulisinnaajunnaarnersiutillit angerlarsimaffitik qimallugit tamarmik suliaqarfigisinnaasaminnik/ornissinnaasaminnik periarfissinneqarsinnaassammata. Qeqqata kommuniani utoqqaat tamarmik sapinngisamik assigiimmik pineqarnissaat sulissutiguarneqassaaq.

### **Suliffeqarneq, suliffissaqartitsineq suliffeqarfiillu:**

Suleqatigiit pingaartippaat Qeqqata kommuniani sulisinnaasut suliffissaqartinneqarnissaat, taamatuttaaq pingaartinneqartigivoq suliffinnik nutaanik pilersitsiniartut periarfissat atorlugit tapersersorneqarlutillu kaammattorneqarnissaat. Suleqatigiinniillu pingaartinneqarpoq Qeqqata kommuniatata suliffeqarfiutaani atorluarnerup pimoorussamik angusaqarfiunissaa. Qeqqani inuussutissarsiornermi siunnersuisoqatigiit peqataatilluinnarlugit suleqatigineqartassapput.

Suleqatigiit pingaartippaat Qeqqata kommuniani suliffinnik nutaanik pilersitsiniartut tapersersorlugillu kaammattorneqarnissaat, taamaattumik kommuni periarfissani atorlugit suliffinnik nutaanik pilersitsiniartunut atugassarititagitut ikiuussinnaanermigut ikiuuttassaaq. Aalisakkanik piniakkanillu avammut tunisassiorneq takornariaqarnerlu annertusarniarlugit Kangerlussuarmut aqquuserngup pilersinniarneqarnissaa suleqatigiit tapersersorpaat. Taamaaliornikkuttaaq takornariaqarneq aqulluarneqarnerulersinnaavoq nakkutigineqarnerulersinnaallunilu.

### **Aatsitassarsiorneq Olie-siornerlu:**

Maniitsumi aatsitsiviliornermi Alcoa-p pilersaarutaa piviusunngortinneqarnissaat suleqatigiinnit tapersersorneqarpoq, suliffiit tassunga attuumassuteqartut pilersinneqarnissaat suliniutigineqassaaq, aatsitassat allat kommunitinniittut iluaqutigineqarnissaat suliniutigineqassaaq. Olie-siornerup aatsitassarsiornerullu piviusunngortinneqarsinnaaneri pinngortitaq mianeralugu tapersersorneqassapput.

### **Takornariaqarneq:**

Qeqqata kommuniani takornariaqarnerup siuarsarneqarnissaa periarfissat najoqqutaralugit siuarsarneqarnissaa suleqatigiit isumaqatigiissutigaaq.

### **Sulisussanik atorfinitsitsisarneq:**

Qeqqata kommuniani sulisoqarnermut politikki malillugu atorfinitsitsisarnerit ingerlanneqartassapput, suleqatigiilli pingaartippaat kaammattuutigissallugulu sulisussanik atorfinitsitsilernerme Kalaallisut oqalussinnaasut salliutinneqartarnissaat, tamatumunngalu peqatigitillugu Kalaallit ilinniarluarsimasut kommunimi atorluarneqarnissaat suleqatigiinnit pingaartinneqarpoq. Ilinniarsimaneq aallaavigineqartassaaq.

### **Qeqqani suliffeqarfinnik atorluaaneq:**

Suleqatigiit pingaartippaat Qeqqani suliffeqarfiit atorluarneqarnerisigut sumiiffimmi periarfissat atorluarnerisigut suliffissaqartitsinerme siuarsaanermik pilersitseqataanissaaq, tamanna tunngavigalugu anguniarneqassaaq kommunimi atortussanik sunilluunniit pisiniartarnermi Qeqqani periarfissat salliutillugit atorluarneqarnissaat. Tamatumali anguniarnerani kommunip unammilleqatigiinnermi inatsisip saneqqunneqannginnissaa pingaartitarilluinnarneqassaaq.

**Asilerisut:**

Ukiuni tullerni Maniitsumi Sisimiunilu asilerisunik atorfinitsitsisoqassaaq, taamaalilluni meeqqat inuusuttuaqqallu asimik atuinermik ilinniartinneqarlutillu assigiinngitsunut peqataatinneqarnissaat qulakkeerneqassammat. Asilerisuttaaq suliassa qarfiinut asimi mingutsitsinerit suulluunniit pinngitsoortinni arnerinut suleqataanissaat ilanngunneqassaaq. Asilerisullu aamma pingaartillugu utoqqarnik qanimut suleqatiginninnermik ilisimasanik tammarneqartussaannngitsunik meeqqanut inuusuttuaqqanullu ingerlatitseqqinnissaat suleqatigiinniit pingaartinneqarpoq.

**Teknikkimut tunngasut:**

Qeqqata kommuniani suleqatigiinnermi isummertaaserput; atorluaaneq avatangiisinillu mianerinnineq ingerlaqqissaaq. Kommunimilu teknikkikkut inerisaavigneqartut ingerlateqqinneqassapput. Suleqatigiillu pingaartippaat maannamut Sisimiuni teknikkikkut misilittarneqareerlutik pitsaasumik atorneqalersimasut Maniitsumissaq atugarineqalernissaat. Sisimiuni Maniitsumilu aqqusineqarnikkut pitsanngorsaanerit isumannaatsumillu angallassinnaanerit anguniarlugit siliniutit pitsanngorsarneqartuassapput. Nunaqarfinni imeqarnikkut, aqqusineqarnikkut kuuffissuaqarnikkullu pitsanngorsaanerit ingerlanneqassapput.

**Piniartunik aalisartunillu tapersersuineq:**

Suleqatigiit pingaartilluinnarpaat piniartunik aalisartunillu tapersersuinissartik, tamanna pimoorullugu naammassisaqarfiusumillu kinguneqartinneqassaaq. Piaartumik anguneqassaaq kommunip nerisaqarfiutaani tamani sap. akunneranut minnerpaamik pingasoriarluni kalaaliminernik nerisoqartalernissaa. Tamanna aallartinneqariissaaq kommunip 2014-imut aningaasartuutissaasa missingersersuusiorneqarnerisa sularineqarnerini. Taamatut iliornikkut Qeqqata kommuniani suleqatigiit piniartunik aalisartunillu tapersersuinerit pimoorussamik timitaliivigissavaat. Tamannaannarli uniffigineqassanngilaq, suleqatigiit pingaartippaat piniartut aalisartullu qanimut suleqatiginerisigut piniartut aalisartullu atugarisaannik Qeqqata kommuniaa pitsanngorsaajuarnissaa. Umiatsiaararsorlutik inuussutissarsiuteqartunut puttasunik talittarfeqartitsineq pitsanngorsarneqassaaq, suleqatigiit umiatsiaararsortut pigisaallu isumannaatsumik inissimaffeqarnissaat pingaartippaat. Ammattaq tunitsiveqarnikkut periarfissat pitsanngorsarneqartuarnissaat ujartorneqartuannassaaq.

**Tusagassiuuteqarneq tusarliisarnerlu:**

Suleqatigiit tapersersorlugillu pingaartippaat Qeqqata kommuniani tusagassiuutit namminneq ingerlasut ingerlaavarnissaat. Suleqatigiilli pingaartippaat tusagassiuutit namminneq imminnut pitsaasumik tatiginartumillu ingerlannissaat.

**Suleqatigiit innuttaasunut paasissutissiisarnerat:**

Suleqatigiit innuttaasunut paasissutissiisarnertik pitsaasumik ingerlatissavaat, tamanna ilaatigut ingerlanneqassaaq Qeqqata kommuniani tusagassiutit atorluarneqarnerisigut aammalu innuttaasunik ataatsimiisitsisarnerit piffissani aalajangersimasuni ataavartumik ingerlanneqarnerisigut.

**Naggasiineq:**

Suleqatigiit sukullunniit nutaanik periarfissarsiuussiuassapput Qeqqata kommuniani sullissinerup pitsanngorsartuarnissaanut, soorlu eqqarsaatigalugit inunnik isumaginninnikkut, ilinniartitaanikkut, innuttaasut atugarisaatigut, suliffeqarnikkut il.il.

**Suleqatigiit Siumut / Atassut isumaqatigiissutaat atsioqatigiinnikkut atuutilissaaq.**

Sisimiut, ulloq 18 April 2013

**Siumut:**

Ejnar Lundblad  
Qeqqani ataatsimut siulersuisoqarfiit  
Siulittaasuat,

John Olsen  
Siumut Maniitsoq  
Siulittaasoq.

Jakob Olsen  
Kommunalbestyrelsimi Siumut-mi  
Siulittaasoq.

**Atassut:**

Siverth K. Heilmann  
Atassut Maniitsoq.

Mette Sofie Lerch  
Atassut Sisimiut  
Siulittaasoq, kiisalu  
Kommunalbestyrelsimi  
Atassut-mi siulittaasoq.